

江

西

詩

徵

江西詩徵卷三十二

南城曾煥賓答編輯

元

杜本

本字伯原清江人武宗朝吳草廬薦之召至京師
旋歸隱武夷山中至正初以丞相脫脫薦召爲翰
林學士稱疾固辭學者稱清碧先生有清江碧嶂
集

題薛元卿瓊林臺

上清山靈都凡山無與儔况茲瓊林臺雲氣接神州嶽祇
扶地軸鬼神動天球珠樹粲瑤城玉衡縣清秋層冰積高

寒梯構靡其由外史洞元化於焉采真遊珊珊紫霞佩皎皎明月鉤手携千歲藤足弄萬里流仰觀縣圃運俯視八極周緬彼大瀛海變滅多浮漚悠然發舒嘯永矣此夷猶武當山張真人奉詔禱雨有應

祈禳致風雨傳說自古先京師大旱連二年地蒸熱氣如雲煙林林嘉木盡槁死毋論黍稷生秋田武當真人張洞淵爲道有心如鐵堅粗衣惡食夜不眠兩眼奕奕光射天天子有勅丞相宣詔君禱雨紆憂煎君坐默不語奏達虛皇前將吏驅蛟龍雷電相後先童童雨脚晝夜懸平地涌水如通川穉禾出土芄芄然小草大木爭芳妍都人士女喜欲顛謂君直是真神仙我今爲作喜雨篇勒諸厓石于

年傳

天冠山同諸學士爲祝丹陽賦

鍊丹井

鑿石通泉岷鑄鼎鍊丹砂丹成騎鶴去滿地生雲霞

逍遙巖

鵬搏九萬里籬鷄飛只尺所以達觀人亦各適其適

玉簾泉

燦爛金爲屋玲瓏玉作簾飛泉來百道定有老龍潛

石人峰

臨風衣自整對月影偏長獨立經寒暑真成石作腸

小隱巖

山深人寂寂澗曲水沄沄顧爾非忘世遺身在白雲

和潘明之

欲試淮南術難期海上翁自爲吳地客不記楚人風
菊黍隨時白葵榴過眼紅獨醒還獨醉至竟與誰同

莫春遣懷

東風吹盡滿林花底用無涯始有涯飲量素慳難止酒客
懷雖惡少思家已諳世味茶如薺未信仙人棗似瓜爲愛
綠陰春晝永出門轉覺換年華

秋興

兩峰高聳竝秋霄雙澗分流送晚潮月冷誰家頻搗練風
清何處細吹簫七閩荔子丹砂顆五嶺梅花玉雪標黃鶴

不來空悵望自歌雅曲和漁樵

送李伯循

已聞盤谷最深幽便欲從君遂此遊春氣和柔朝採藥秋
風清徹夜行舟巖花冉冉難留客汀草纖纖獨倚樓楊柳
新條不堪折只須買酒換離愁

寄題竹軒

綠竹脩脩處華軒楚楚深莫留雛鳳宿曉聽蟄龍吟月進
窗櫺影雲移几席陰居然淇澳趣莫使俗塵侵

題周南翁悠然閣

大江之東彭蠡南周家高閣與雲參秋風猿狖啼青嶂莫
雨蛟龍起碧潭遶屋千叢生杞菊過簷百尺長楸楠何時

其此登臨樂指點山川與縱談

廉州阻風

自因三宿致綢繆豈爲狂風殢客舟
鄉國十年思舊雨河
山千里記前遊黃雲釀雪禾將刈
綠霧籠霞橋漸收離別
不堪成悵望雁孤飛起白蘋洲

漁隱圖詩爲程子純賦

山下白雲縹緲水邊紅樹依稀信有桃源深處漁人今亦
忘歸

寄楊仲宏

老來自愛黃叔度少日真期魯仲連
高卧獨無田二頃曳
裾誰有客三千滄波渺渺浮鷗鳥
白日翩翩換歲年却憶

江東楊少尹劇談終夜不成眠

用韻贈相士

武夷九曲好清流且櫂扁舟試一遊
高挽藤蘿捫翠壁緩穿竹樹問丹邱
黃金徒貴誰求馬白石空歌自飯牛
盛世鳳麟如要識莫耽幽討更遲留

題小景

秋雲滿地夕陽微黃葉蕭蕭雁正飛
最是江南好天氣邨醪初熟蟹螯肥

酬虞伯生

滿窗風雨夜沈沈獨對青燈萬古心
徒有故人憐白髮自無奇骨換黃金
茅簷暖日須看獻竹簡遺經正用尋
豈愧

執鞭非所好甘隨麋鹿放山林

趙由儕

由儕字與儕號中山居士南豐人性孝友詩爲吳
草廬虞道園所賞

述祖詩

悠悠我祖始于軒邱撫歷高陽秩秩大猷爰自伯益舜錫
皁旂中衍事商造父御周征彼徐方熊熊有功邑于趙城
大河之東建氏晉國耿先其封成宣喻日畏夏愛冬岸賈
作難嬰曰立孤襄子始大常山得符於赫列侯懋建丕圖
肅矣武靈兆配有虞西漢子都生長河間暨于唐末合族
君燕卜遷大梁世系緜緜厚德豐功宜永其傳中罹多難

南歷江沱眷焉吾宗豐水居多百川有源衆條有柯庸修
家牒克俾無訛因余伯仲憂患多更瞻歎古烈自憐其生
其生豈偶三辰垂精德業未進敢不戰競我心伊何常念
厥初感彼霜露愴焉踟躇奉先如在宗戚相於亦有護草
高堂可娛惟忠惟孝立身有本嗟爾後進勗哉自勉萬有
能銷斯道無泯溫恭朝夕云胡不謹顯親揚名俾昌俾熾
善保家聲期于勿替尚念前人畱心譜系受天之慶遠及
苗裔

思親詩

并序

余讀魯齋許文正公七月望日思親詩因見其天
理沛然自胸襟流出永感者聞之必增其悲具慶

偏侍者由此寧不加敬自思兄弟往年當喪亂之
餘不幸失怙藉慈母教養成成人真昊天罔極之恩
也輒推廣其意而述五言古詩一篇以紀平居之
懷納之書藏將示後人俾知所自云爾庚戌歲二
月望日識

一自先君逝行將四十春音容尋舊夢感慨試詳陳已歎
生緣淺還思故國屯吳江悲血戰粵嶠困車麟共託艱危
甚尤驚賦斂頻朔風吹廣野赤日照流塵卽灑呼天淚方
爲辟地民撫時非往昔感憤竟湮淪翕霍傳梅外倉皇問
水濱諸孤隨弱母大慟向秋旻越歲寧戈甲歸鄉辦窳窳
酌觴號雪夜扶柩履霜晨家緒中微甚人閒事一新孩提

慚不肖操守賴慈親絡緯燈前教襁褓膝下馴田廬勤保
任門戶幾憂辛文獻由先德扶持荷化鈞宣華明晚景荆
樹際芳辰眉壽斟瓊蟻春暉奉繡茵雖非登執要自不厭
清貧努力尊天爵勤心報大倫歸全期不忝化俗冀還淳
信墨存家乘傳芳待後人年年思雨露歲歲省松筠至念
通天地長歌感鬼神珍藏歸韞匱大孝慕終身

彭鏞

鏞字聲之清江人龜年裔孫有詩名與郡人楊士
宏輩結社虞道園亟稱之號清江酒民有蕙楊稿
送玉筍生道赴京有代祝嶽瀆之行

王子緱山載碧笙遠隨丹詔觀神京秩宗祀典虞書在封

禪壇壝漢時平玉笥雲連龍虎氣金陵天近鳳凰城祝官
拜望承恩早小朶樓西散珮聲

楊士宏

士宏字伯讓襄城人祖仲明官清江遂占籍焉嗜
學工詩有鑑池春草集

梅谷井

茗飲貴山泉江流亦其亞甘寒如此井清絕梅花舍

送方瑞鈞臺山長

富春江上釣臺高旁築書堂處俊髦要爲鄉閭施教化更
因山水暢風騷罄鹽供養寧嫌薄朱墨研磨肯憚勞至日
菊花黃滿地淋漓觴酒任君操

劉東叔

東叔字春谷贛人南豐州學正

寄水村先生

朝走廬山塵夜臥廬山雲可人遠千里可望不可親
彭蠡朔風急冥鴻噉離羣游子煩中袞離思恐作紛
別來五十強落月幾屋梁那得如比翼上下相翩翩
風搏地上蓬雨摧樹上花生時各異處零落猶交加
人生不如物一失難再覩恨無萬車絲引索繫白日
近詢帝城書消息知何如一命如此靳朱紫伊誰與
三年飯湖稻歸假南豐道再去見軍山應知山色好
士生天地閒貴在心相知相見庸有盡相知無盡期

王子東

子東上饒人

新春新月

舉頭見新月低頭過新年新年幾回新新月幾度圓鍊石
屑寶功難全娥能竊藥終孤眠夢中蝴蝶飛翩翩花草何
意爭春妍憂杞之憂逐夸顛無情有情憐不憐長星不飲
酒牽牛不服田東風解織千機錦淺白深紅在眼前

采桑歌

翻雲烏鴉影鬢髻颭風白燕雙傴僂橫波凝流斂秦娥吳
豔餽餽饑則那十纖挽柔剪綠柯六幅暗露侵襦綱饗飧
薦誤晷隙過蠶饑葉稀寧不瘡千頭萬緒豈敢訛終以暖

事期絲絀錦帷繡幌相婆娑人情好新不厭多倚門刺紋
來聽歌載青載黃胡則頗樹閒耳語慎勿哦萬一出口他
人訶纂纂桑甚如鳩何

中秋

青天化作白玉盤捧出七寶玻璃觴姮娥起舞太白醉如
此風流胡可忘北斗酌取瓊河漿秋風製就芙蓉裳龍吟
泓下虎嘯壑誰能著耳聽啼螿

張洪厓神游圖

并序

洪厓卽果老唐元宗以玉真妃故洪厓去之往來
長安騎白驪名白雲攜五童以酒瓢詩卷書囊隨
之

開元天子舊相知一笑曾緣降玉妃囊括無言元自得飄
虛有酒醉同歸晚山殘夢紅塵遠春圃靈苗白雪肥回首
長安西日外神游何處片雲飛

和胡梅復白鵬

若爲見月倍思家偶憶禽名起句華拂羽增明聯編袂綴
冠合榮蹙嬌花朝尋暖草雲連谷夜擁寒坡雪載沙只與
鶴琴清作伴可能無夢繞烟霞

祝元美

元美上饒人

贛王從義御史

志士身未達端居若無爲一朝立清要埽決浮雲披王君

北方彥絢練丹鳳姿經綸有術業大節能素持青驄入南
臺白簡晨霜飛惟時總六職百職不敢墮鴈鷗擊霄漢鶚
獬安得窺苦心在庠序勉勵靡有遺春秋嚴大祀禮數推
毫釐溫然載言笑匪怒伊教之青青歌子衿荒穢久不治
明公欲振廢恩義當兼施吾儒貴補報豈直分寸裨胡爲
往庶役猥令吏得欺以茲失生遂衣冠困塗泥何當復其
衽庶使迴澆漓神駒一超越駑馬思驅馳芻蕘儻可問風
俗期當移我生萬山中耕鑿甘自怡奈何苦隳突雞犬不
得棲遂令布衣士何由食山薇彈冠出巖壑逝拯斯民疲
浩歌視行雲白日迴清輝明公一攬轡慷慨投茲時

蔡九思

九思上饒人

雜興

鬱鬱桑與柘環圃俱淒淒采之樂蠶饑復見青滿枝廣疇
稻田多種之恐遲遲蠶婦與老農何嘗一解眉芳春各載
酒競觀羣葩奇錦衣與稻梁辛苦元不知

鸞鵬與騏驎跡遠識者稀鶴鶴與鷓鴣或亦摩上飛和鳴
相上下惜無養由基閉門思古人玩物真何爲聖賢不我
欺千載還相期

訪太元天師

飛車擁蓋下三神曠視齊州九點塵黃石穀城千載意翠
壺蓬島四時春嵩高海闊丹書遠地闊天開紫氣新見說

桃花紅萬樹扁舟來問武陵津

李宗冽

一作烈

宗冽南城人

題嶽谿禪林精舍

朝游適嘉霽遂暢尋山願
佳日破層陰晨經罷幽殿
年深樹益繁像古閣重建
夜來天地霜松色了無變
宛然巉崿閒廬嶽復此見
山僧四五人屢訪期識面

和傅伯永月夜泛舟

夕霏已埽林綠波際遙天
浮雲蕩倒影相與度清川
愛此山水趣聞歌心益便
沿迴隨意遠落月照歸船

古隴頭吟

天寒隴水鳴鳴咽夜領銳兵從此發海風吹人眼欲枯上
隴猶看嶺西月悲笳蕭蕭霜滿天十里一墩烽火連去年
初度彈箏峽今年復引月支泉從軍辛苦事征討將軍功
大殘兵老

秋夕江上

水館螢飛入沈沈夜未眠衆星搖雨後孤月轉河邊草木
寧悲候江山不記年忽聞吹急管況有估人船

贈深上人

處處隨緣到經年此託踪不言鄉國遠惟指對門峯

代項氏怨

并序

燕山項氏其夫江南人行賈燕薊聞聘項氏與居

未幾夫死項氏年二十奉柩回江南誓以夫餘貲
養姑以自終比至姑改適項勵志子居以守夫祀
余憫其事而賦之

少無依倚老何堪白髮婆婆亂不簪夢裏尚思江北好悔
將夫壻葬江南

施性初

性初臨川人

古井

地脈深三丈寒甘漱石巖最宜探月色獨坐聽泉聲早許
鄰人汲廢餘秋草生元非投轄處水不近交情

秋日田家

高高青櫟樹忽有鵲鳩鳴雨後晚田熟門前秋水生鄰家
賽社去野犬吠人行泥潦相淹久明朝歸計成

郊園宴集得荷字

脫帽長松下探幽到薜蘿翠禽翻岸篠紫芡刺池荷人影
追涼散蟬聲入暮多當攜謝公妓載酒重經過

萬年坪坐雨

復此留三日秋陰未肯晴雨懸高樹白坡落石泉清未可
言羈寓聊堪遣性情草虫籬落下時作不平鳴

喜徐宗道自金陵歸

雲樹相思久年年賦式微淮南芳草歇江上故人歸日夕
開新酒天涼換袂衣從容亦自好墨綬與心違

李道傳留九江以詩見寄

水鄉城郭晚煙稠遙想思歸上庾樓
潮落湓城魚作浪雨餘淮甸麥先秋
一樽濁酒懷親友數首新詩歎客愁
我正山中招隱者秋風應棹木蘭舟

趙果

果臨川人

題劉松年廬仝烹茶圖

玉川先生多好奇清才逸韻誇當時
披圖已及數百載髣髴猶覺清容儀
先生讀書閉柴扉翛然養道超希夷
烹茶老婢脚不韞致鯉蒼頭鬚滿頤
隔牆惡少不解事側目未免相陵欺
收縛時蒙縣宰正長者處置非爾爲
鳳團煮鼎

汲清澗適意啜飲哦新詩大賢寄跡諒有以七椀豈必徒
規規丹青模寫不盡意勁節高風千古垂

李核

核字意山臨江人

題郭主簿模摩詰本輞川圖卷

豬龍兒戲錦綳好三郎歲晚歡娛老阿環姊姊擁華清朝
士宮前誰敢到右丞脫却尚書履布韞青鞵弄煙水藍田
別業堪畫圖矮本丹青自游戲華子岡輞口莊湖亭竹館
遙相望小橋摺轉青紅窗樹窠歷歷煙蒼蒼樂家瀨前兩
舟上柳浪一尺春風狂詩成與和者誰子我外裴迪誰能
雙邱壑風流妙如此安知畫外淒涼旨凝碧池頭天樂聲

白髮藥臣淚如水亂後歸來舊第中元牆綠戶老秋風人
生過眼皆夢境乞與山僧開梵宮半幅吳綃如傳舍俟誰
得此千金價客來寒具莫匆匆四百年前御廚畫

一
鎗敬

敬字伯敷清江人

賦得瀟湘曲送復上人之湖南

瀟湘露白西風起江竹斑斑澧蘭紫神僧八月遡星河木
杯飛渡瀟湘水瀟湘兩岸遙相望仙人霞裾白霓裳炯炯
吳絲照清浦鳳梭製錦迴龍章翠管銀牋爲誰寫珎珎蟻
珠爛盈把蘭橈歸來江渚空五兩懸風疾於馬鷓鴣啼雨
蒼梧秋渺渺吳雲天盡頭翠珎刻得蛟龍字寄逐南鴻湘

江言得
水流

吳一嵩

嵩字維申廬陵人

東園有桃李

東園有桃李倚日如娉婷春風一吹拂過眼成青青
不可恃行役秋已零誰能觀無始坐此累有形俯仰百年
內死生俱未停

西齋

西齋客已散今日我得閒細細花上雨蕭蕭雨中山兩鳥
從何來對立鳴關關微生共節序此意相往還頃者曾劇
飲東風吹醉顏忽見一花落起坐爲長歎人生快心事固

在偶然閒

呈劉省菴

青年漢宮舞玉佩懸明珠
倻倻羣女中桃李搖光腴
一笑承主恩浩蕩春風初
流光去人短零落同榛蕪
尚持娉婷姿顧影羞泥塗
同時金屋人半臂紅羅襦
醉促琵琶弦歡酒歌帳廬
翻憐漢恩淺未盡平生娛
空坐獨永夜回首雙淚俱
大節誠未修不如長捐軀
煙塵令人老末路多踟躕

車遙遙

車遙遙舟迢迢斷送行人
幾暮朝車馳道路不停軌
舟挾風波難住橈家中雖
貧常在目每恨舟車苦相
促但行一日兩日程生死
與君非骨肉瞿塘水深蜀
山高橋傾轅折

不憚勞何當萬里隨君去得似篙師與車御

古釵歎

何年美人寶釵失深井沈泥汙的皪一朝拾得再揩磨三
回五回看歎息雙鸞匹鳳兩股勾終然汚色難爲新當時
光瑩照頭上有似桃李搖青春今人不識古儀狀寶釵雖
好非時樣爲君插罷擁髻悲物無貴賤皆隨時

送舍弟歸鄉

風急晚花落雲長秋雁回相看猶喪亂此去更驚猜涕淚
何時盡音書數日來窮途兄弟少懷抱可勝哀
已別復攜手依依未忍行向來垂萬死能不惜餘生鄉國
多青草風烟動紫荊十年已多感回首若爲情

古意

美人插新花恨不逐時好花亦解自憐紅顏已成老

歐陽伯恭

伯恭廬陵人

蘇武李陵泣別圖

祈連山前箭如雨渤海岸邊氐不乳同是肝腸十九年白
髮君歸朝故主臣心有血一斗許亦欲隨君歸疊鼓五千
健兒五千母臣若獨歸魂魄苦空將老淚寄君歸歸灑茂
陵墳上土

天馬歌

天子仁聖萬國歸天馬來自西海西元雲披身玉兩蹄高

餘六尺修造之七度海洋身若飛海左海右雷霆隨天子
曉御慈仁殿天風忽來天馬見龍首鳳臆目如電不用漢
兵三十萬有德自歸四海羨天馬來庶政平天子仁聖萬
國清臣願作歌萬國聽

羅觀

觀廬陵人

五華樓

世祖平南九十春蒼山花木幾枯榮曉寒海氣連雲濕夜
靜鐘聲帶月明滿目鰲頭疎雨寺幾家籬落夕陽城不堪
樓上弔今古斷鴈西風雨袖輕

劉君賢

君賢等都人

龍門夜雨

山下青溪溪上苔坐將兩脚洗黃埃
波深雨冷神鰲隱收拾綸竿屬後來

五十四

五十四南昌人

題盧賢母卷

樵隱盧君母最賢母儀婦節兩超然
相夫德治周南化教子名宜太史編
華屋萱蘭春藹藹影堂松桂月娟娟
時清重憶願鸞詒百世幽光發九泉

王武

武豫章人至正初爲翰林國史編修官曾命代祀

霍山中鎮撰中鎮祀香記

送傅與礪廣州教授

與子俱客燕相逢閭里閒意氣卽相許然諾在一言南金
非所重燕姬非所羨古稱慷慨士捐軀赴人患自謂金石
交從今至歲寒子忽遠行役喟然傷肺肝

執手出都門長揖從此辭遊子歸遠方壯士亦苦懷鄧林
非無木木惡不可棲冀北非無馬馬驚不可馳高天上無
極浮雲將何依日月苟不修重來以爲期

康

瑞一作康

瑞字瑞玉龍泉人博學能文尤工樂府詩爲虞道

園畏友至正初授新淦州學士教授陞龍興路富州判官

西湖竹枝詞

蘇公六橋柳垂堤照見郎君鞍馬肥蜻蜒蝴蝶不相識各自相憐尋伴飛

南高峯頭雲未開北高峯頭雨頻催爲雲爲雨幾時了醉裏相期夢裏來

合歡釵頭雙荔支同心結得能幾時蓮莖有刺郎解折蓮子有心奴自知

拍湖春水段家橋紫額湘簾碧玉簫橋邊楊柳爲誰苦惹風光千萬條

倪鎧

鎧字仲瑤安仁人博學宏才至正初應文學選任南康路教授再遷晉寧知州有惠政奏立錦江書院爲後學所宗

題徐秀軒清隱卷

處士聲名海內聞爭看詔錫起夫君只因愛讀希夷傳古木蒼山友白雲

劉中孚

中孚字志行吉水人舉茂異授承務郎德慶路總管府經歷至正初遷南雄路推官却湖寇後知英德州以完城功擢肇慶路總管辭不就卒

遊三洲巖

蓬萊夜失第三山飛落城東錦水灣
洶灘聲朝雨後參差巖影夕陽閒
野花隔岸自開落仙子與雲相往還
坡老已歸詩句在空畱名姓刻巉頑

龍武佳城

阿婆埋骨白沙堆五顆驪珠去復回
雄劍不藏城底獄神梭已化澤中雷
鬱蔥氣合祥雲起溟漠魂歸細雨來
別有馬跑滕氏室誰知靈種亦龍媒

周聞孫

一作景孫

聞孫字以立吉水人至正元年鄉舉薦入史館修
宋遼金三史時朝論不以正統予宋聞孫具疏爭

之遂奪職歸爲貞文書院山長有集

贈楚金郭將軍

郭將軍才且武快如鶻力如虎前日戰周嶺頭昨日戰桐
江渡殺賊如麻血填路手持髑髏擲向天倒持月戟還起
舞丈夫知有忠義膽慷慨一身思報主日慘慘兮揚雲旗
雷闐闐兮吼鼙鼓郭將軍爾乃汾陽之子孫百戰餘勇今
尚存洗盡氛濁尊乾坤中書勲業冠千古萬里封侯何足
論

酬若水同知

金川之西赭衣爲妖毒霧噓草木殺氣橫烟霄蚩尤揚幟
迴高標彎弧挾矢幾人欲射不得發夜復夜朝復朝側身

注目常恐峽外星辰搖吾家眞將軍今代霍驃姚意氣四
出雄風颺洗兵桐江上躍馬蕭灘橋指揮貔虎三千士大
呼陷陣翻江湖可翻此心不移白日耿耿皇天燭之
功成獻凱知有日日邊消息何來遲虎頭食肉今何在布
衣憂國誰得知君不見當年赤壁戰正在少年時呼鷹走
狗紅塵裏羞殺長安輕薄兒

贈源源縣尉

疾風吹塵暗長河白蜃搖毒翻江波長淮鯨去洞庭坼魚
龍濺濺愁如何吾宗起家古名將身扞三邊擁孤障河魁
夜夜直轅門大角勾陳屹相向腰閒寶劒龍蛇纏寸斬兇
渠靜八埏指揮能士隨顧盼馬上躡黃金鞭男兒許國

寸心赤平安更慰庭闈憶署郎心與拾遺同苦爲蒼生憂
社稷凱歌迭奏聲如雷誰肯霜天吹落梅江南消息憑誰
寄明日天邊驛使來

櫟社草堂成次韻

伐木驚春冷披榛得燼餘三閒楊子宅七世伏生書谷口
慚招隱花溪憶釣魚自傷車馬少未敢大門闔

吾廬經久廢過客盡相驚草引清池合門隨小徑成生還
稱地主亂定識人情庭樹全消落西風折紫荆

擇勝居求舊開荒住少鄰落成非易事經始愧前人喜報
狼烟息愁聞虎跡新寄資深有待寒谷未回春

田舍

幽隱從田舍，朋條借客居。
春風惟見燕，暮雨欲生魚。
避濕藜牀穩，全生藥裹疎。
安危天下事，不敢計吾廬。
脫身戎馬地，投跡野人居。
地瘦冬無笋，江清晚得魚。
窮知生計拙，懶與宦情疎。
遠愧貧司馬，還家有敝廬。

題環翠樓

樓前對酒野鶯啼，樓上看書曉霧迷。
萬壘雲山遮不斷，四簷松竹長皆齊。
青蛇每候回仙過，黃鶴能招太白題。
塵世不離蓬島外，闌干只在斗牛西。

送從事龍光庭

文通五色筆如刀，力掃千軍勝六韜。
開府論功青入幕，轅門略陣白爲袍。
篇章自昔推書記，鞍馬新來屬掾曹。
贊畫

從容有能士風雲行見擁旌旄

劉玉汝

一作汝玉

玉汝字成工永豐人至正元年鄉舉

次友人感興

常期冠冕治朝臣豈意天戈老此身耿耿泉阿埋地底盈
盈牛女隔天津誰憐潦倒長爲客自昔娉婷不嫁人寓跡
城闌聊自適琴牀書几淨無塵

九江逢故人

九江江水抱城迴洶涌回濤亦壯哉雨散淮濱隨地足雲
移廬阜向天開曳裾鄒子長爲客待詔公孫已擢魁邂逅
他鄉急呼酒樓頭今日早秋來

一朱公遷

公遷字克升樂平人徙家金山至正元年領鄉薦
後徵入京師累官翰林直學士院勸帝親賢遠佞
當國者惡之章七上出爲金華學正其學淹貫經
義題其室曰陽明之所時稱明所先生

登高山

雲氣陰陰隔樹亭身憑高處眼雙明苦無黃菊供人摘只
爲青山了此行孤鴈飛來風正急一溪流出水尤清良辰
向復用佳友不用辭君滿酌觥

縉雲山中夜坐

閉門清坐意超然卻有愁懷斷復連木葉怕寒霜滿地梅

花照影月行天山林歲晚身猶在砧杵聲高客未眠起傍
茅簷聽過鴈哀鳴只在白雲邊

春日書齋

掃去塵埃境自虛山靈爲我護琴書眼看白日知天近身
傍閑雲與世疎好學誤生千載後醒心多負五更初春華
不是初吟伴昨夜牕蕉一葉舒

舒慶遠

慶遠字伯原靖安人至正元年鄉舉授贛州學正
未赴會寇攻靖安監縣潮海敗死省府署慶遠攝
縣事寇至屢却之以憂憤卒有攄悶錄

上洞

避地翠嶺西幽居絕蕭爽行攀薜蘿入坐對琅玕長石雲
書不收巖瀑夜逾響願與鹿門公攜家共長往
竊窵絕窮嶸崎嶇歷崇邱白雲可延佇清泉宜浣愁松涼
健黃犢山雨鳴蒼鳩農談有至理坐語夜忘憂

山洞晚眺

西日未落月生東林塘悠悠殘暑空山風應隨石洞出澗
水直與靈巖通天光窄若巫峽底地勢阻如盤谷中擬於
松下置碁局或可邂逅商山翁

遣悶

堯天蕩無際大明廬中區稜肯從南起偏翳牛斗墟豐蔀
見星妹睽弧張鬼車虐焰肆焚灼妖訛扇兇愚安得古神

劍一出爲掃驅

述痛

去年春涉夏親疾正艱危吁嗟秋始交竟作終天悲死者
既長逝不見茲亂離我生邁陽九何以爲懷思

堂北萱草花花瘁堂亦燬何以忘我憂懷思曷能已曠遠
佇遠眸幽棲保遺體殘喘乃幸存成家自茲始

狡狐行

山家鬻獐犬乳犬皆從哺夜半雞鴨喧有狐來不虞主人
起奔逐帶月荷鋤踪跡搗其穴居然獲三狐鄰家曉相
問笑語成懽呼獲狐良足喜搗穴絕根株吁嗟此雖絕他
穴狐豈無要知彌盜計脩禦乃良圖不如家家畜獐犬狐

自不侵雞鳴雛

老牧歌

朝牛上山兮露未晞夕牛下山兮日已微朝朝夕夕兮與
牛同歸朝巖霏兮昧目夜山雨兮沾衣水草遂兮牛飽吾
白不知夫渴與饑吾聞百里奚爵祿不入心飯牛而牛肥
復將千金軀自鬻五羊皮嗟吾老在山中牧那知人間爵
與祿五羊大夫非自鬻終日飯牛徒碌碌

憶悠然屈公

平時兩地頻通候一月何曾缺數書道路干戈愁虎豹郡
城音問斷樵漁遙憐宵柝驚詩夢更憶寒雲鎖隱居陋邑
摧殘最嗟苦先廬灰燼已無餘

憶克正南鄉諸友

清才妙韻憶諸君，半載音書絕未聞。
舉酒遙憐當檻月，登城空望渡江雲。
志高漫擬平淮頌，筆弱慚無論蜀文。
溪上風光堪痛惜，祇餘山色晚紛紛。

借書

明經自是平生志，文史年來意頗勤。
定有漢書堪借讀，山中遍問牧牛人。

朱倬

倬字孟章，新城人。至正二年進士，知遂安縣。有惡政，寇犯遂安，吏卒逃散，倬大書於壁曰：「生爲元臣，死爲元鬼。」遂赴水死。

拜曾文定祠

南豐才名天下稀南豐祠堂常掩扉美哉諫議賢嗣續卓
爾歐陽相等期蒼煙細雨墓門樹黃葉小船苔石磯元豐
遺稿可千載元豐遺民今是非

遊龍洞

雲氣空濛龍洞開松風吹雨石崔巍龍公昨夜應相語明
日題詩遠客來

黎應物

應物字伯讓新喻人至正五年進士官漳浦令奔
父喪歸值寇亂陷於南城立旗幟與當事同任招
諭尋署南城事因饑構疾卒

蘭竹菊梅清意四首爲胡一清賦

幽蘭何猗猗羅山在空谷光風汎微和千巖散清馥采采
自紉結愛之重金玉持以遺君子庶足供佩服永懷同心
意令德期自勗

庭前有修竹上與浮雲齊虛心若有容勁節當自持繁音
日以密鳳凰來何時好風忽自南悠然古人思盛德不可
諛咏歌淇澳詩

籬菊有黃華粲粲秋霜後衆芳久搖落晚節良獨秀裊露
白采掇終朝不盈袖瞻言贈遠人一壺倘堪侑服之可長
生相期介眉壽

南州麗炎德嘉樹寒始華春風何獨私羣木俱未芽高標

自皎皎盈盈吐奇葩折枝遺所思遠在天一涯願堅冰雪
心貞自古所嘉

醉歌行贈別何鍊師

呂仙種竹西江邊竹成仙去今千年春風迸籜森矗矗秋
露滴粉涼娟娟疎林月下影更好秀色霜餘心愈堅吹簫
時有鳳來宿曳杖或化龍蜿蜒隙地兩三畝茅茨八九椽
寂寞鎖塵鞅來者誰能憐何君前身是呂仙結習未了三
生緣重來此地構雲屋嵯峨紫翠凌飛煙一壺藥隱白日
月九轉丹成非汞鉛風霆雲雨在掌握火棗交梨生寸田
心如明鏡眼如電萬象不敢逃媼妍乘風御氣遊八表却
隨驄馬來朝天天門九重五雲上蓬萊宮府遙相連願仙

真人皓白首，握衣倒屣來。相延胡爲掉頭，不肯住長揖。逕上西江船，我來折花廣寒殿。天街握手心懽然，承恩再拜辭闕下。銀河歸棹同洞沿，秋風吹寒浙江漢。長歌雅笑談元元，爲言桃實今朝熟。正是中元七日，前太乙蓮舟盪雙槳。錦袍公子開瓊筵，秋光如水挹北斗。五老參差列豆籩，昨夜緱山會笙鶴。神餘麟脯非腥臠，笑執浮邱袂醉拍洪崖肩。顧瞻梅子眞，爲我迴雲駢。天高地厚長不老，豈羨人間秋八千。忽持白羽過湖去，但見明月當空圓。江神水仙俱駭走，却去豫章城裏濯足臨清泉。君歸豫章城，我有廬山趣。唱罷仙人水調歌，又騎黃鶴朝天去。

青山白雪歌題李白詩藁

峩峩青原悠悠白雲行吟坐嘯樂爾天真山中之雲起膚
寸迷茫轉覺殊遠近芳年不受利名羈爲愛山林甘習隱
朝采山中薇白雲爲汝衣卷舒變化千萬狀隨時掇拾皆
成詩暮投山中宿白雲爲汝屋墨池噓氣夜淋漓自寫新
詩還自讀雲何爲今日悠揚胡不爲雨潤九江君何爲兮
在空谷胡不乘雲遊帝鄉山中看雲知更好我昔學吟空
自惱春花秋月費雕鏤白石清泉漫幽討何如熟讀雅與
南共鳴國家治世音長才壯志有如此未應出岫還無心

宿直省署

東曹上直夜將闌自把刑書秉燭看鼓角令嚴霜已肅風
梧葉落雨初乾讀書長羨爲官好霑祿方知處世難曙色

熹微君相至鐘聲到枕豈容安

前祕書監也速迭兒建書院藏書

大監辭榮歸石室散金四海購遺書
鄴侯自覺牙籤少太史猶慚轍迹疎
春暖香芸娛日永雪侵汗簡惜冬餘
墨池錦里同千載安得相從校魯魚

七夕

月出江波靜天低河漢流
今宵會靈鵲何處望牽牛
莫問支機石慵登乞巧樓
雁峯在何許安得挹浮邱

周墩

墩字子震鄱陽人應極族子伯琦兄至正五年進

士官翰林國史編修

送弟伯溫之廣東僉憲

繡衣使者出南荒
鵬鵠潛形蜃氣藏
漢節暫披蠻嶺雪
宮袍猶帶御爐香
風清瘴海霜天曉
雨洗炎洲夜月涼
早晚除書兄手草
紅雲須待雁成行

宋應祥

應祥新喻人至正七年進士

過雲章閣故基有感

閣中萬卷賜來書
尚憶春宮講讀初
百世共知師道在
千秋誰念劫灰餘
定因省俗詢遺跡
兼解求賢訪寓廬
倬彼雲章何處是
春來萬變在空虛

王禮

禮字子尚一字子讓廬陵人至正十年鄉舉授安遠教諭改廣東元帥府照磨入明屢徵不出嘗輯

同時人詩爲天地集陰以謝翱自寓有麟原文集

按通志作王子讓誤以字爲名今改正

竹林歌

竹林兮修修負郭兮幽幽清源在右兮鶯渚中流清風如濯兮良月如鉤良時勝景兮誰與吾儔百壺清釀兮歸與婦謀嘉賓戾止兮珍吾肴饌賞心迨暇兮以邀以遊光陰過客兮富貴浮漚綠鬢一變兮楊花滿頭胡不日以嬉兮懷千載之長憂我勸兮賓醕賓醉兮我謳竹林竹林兮吾託爾以優游

涂淵

淵字漸亨號文淵靖安人至正十年鄉舉紅巾寇起與舒慶遠胡斗元倡義拒敵出請救援迨歸城已破淵招輯遺民邑人德之

禦寇紀事

亂寇混天地以北復以南負恃山險隅橫毒肆狼貪壞斯民田業汙斯民女男焚斯民廬舍迫斯民苦艱我民用大棘我民受大難

哀民患孔棘哀民患孔殫哀民心孔傷哀民骨孔剝奉天威之揚望天命之將天命悲弗康天心悲弗臧迺合羣公護迺舉義師強

迺申復迺令迺敦復迺詳誓速斷賊吭銜誓淚浪浪一戰
城北陰再戰城東陽金鼓聲田田武夫容洸洸賊兵四面
來衆士各舉鎗黃雲推木牛破陣如電光破陣擒賊主生
挾歸戎行皇師不整旅下民效愚強臣淵昧死拜主德浩
無疆

賊兵復大聚凶橫勢更揚闔閭邊四塞震天來四方黃雲
氣力盡勇士生乃戕淵出請救援大兵苦奔忙旋聞未數
日邑中愈倉皇舒君憤執死胡君憤敗亡踰地復號天天
心何忍傷

民患猶未除民氣猶未回民命各奔逃民心傷流離淵乃
大聲呼叫集民子遺殘民曰嗚呼其盡終何裨同爲救吾

民君當全吾尸乃謀民之食乃奠民之居糾全合境上佇
待承平時痛定復思痛痛恨無終期

盛景年

景年字修齡新昌人至正十一年進士

送胡正辭

春水淡無姿垂楊雨方綠送人南浦岸飛下雙鸛鵲鵲
羽衣短只過溪南宿征帆順風去萬里隨鴻鵠趨名莫憚
勞旣榮還慮辱賓階有富人清論俱成俗東吳開漕府郎
吏明如玉時艱海亦枯莫盡杯中醪

待馬易之不至

幽人期不至獨依庭樹行不覺出門去滿湖春水生微雨

庭橋上遣人騎馬迎應想來漸近隔牆聞語聲

題山水畫

登渡見孤舟穿林望高閣雨餘泉脈動日照巖光薄閉戶
茅屋深汲水松花落回首白雲閒兩人相對酌

遊鳳林飲周子順宅

芙蓉隔秋水水深不堪採小階涼氣生空牆竹陰在杯行
日暮賴人情醉中改忽驚潮水來門前有東海

萬頃雲亭

浮雲海上來西橫太湖過散彩涵秋汀垂陰入虛坐日照
天影移風吹浪紋破開窓綠樹閒何人讀書臥

白鶴觀

幽境松竹清人行陰露滴獨天下階眠一廡當門績旌幢
高殿閉鐘磬虛堂寂道士不相逢蛛絲懸素壁

哀歌行

江州在江南舒州在江北楚人輕佻厭承平抵掌吹唇弄
鉤戟私鹽船上插紅旗下江八城如剪急前年江州李侯
死余侯今歲舒州沒獻策俱登龍虎榜專城不避豺狼窟
文章已照汗竹青姓名只與秋虹白當時儒服世所輕一
代綱常兩侯立李侯能死亂離初割地斫開忠義途題詩
屋壁雷電走下視白刃能捐軀可憐幼子如玉雪揮之不
去亦已殂余侯固守六載餘捍庇江淮功莫逾臨藩不借
淮陽粟聞道久絕長安書一朝城壞侯已死妻子賓客同

時俱兩賢相對如壁立江水欲流流不得瞿塘破碎白日
昏盤渦無底潛蛟泣江南江北春冥冥忠魂對語百鬼驚
江蘭旣芳復欲歇江豚吹浪何時平江邊大船搖四櫓不
載私鹽載兒女却厭紛爭無了期夜祭船頭過江去

和汪以敬病中作

白髮將軍少健強經旬寂寞臥空牀涉江出城問病早下
馬入門聞藥香深院雨晴蒼蘚合小樓人散綠陰涼家書
不到看春暮昨夜新裁白苧裳

朱夢炎

夢炎字仲雅進賢人至正十一年進士官禮部尚

書

葉氏望雲樓

凭闌越溪上，悵望流雲度。遠水積長陰，沿林引輕素。如何天外雨，不灑江南樹。萬里極迢迢，踟躕歲華暮。

曾堅

堅字子白金谿人。鞏後裔。初從吳草廬講學。華蓋山至正十四年進士。授國子助教。陞翰林修撰。出任江西行省郎官。後擢翰林直學士。卒。有《望周山金石齋青華閩海諸藁》。

貞節篇

齊女爾毋譁，衛姬爾勿喧。屏爾妖以豔，聽我貞節篇。貞節出東南，高門尚雲連。門上懸大字，敕書下天邊。門中建大

宅堂宇何穹然幽窓疏而閒燠室靜且便琴瑟旣不御絲
麻仍在前巖巖白髮毋膏沐久棄捐趨庭子若婦婦順子
更賢愉顏奉甘旨禮節能周全清晨具肴饌烹鱖赤鯉鮮
母乃太姬裔豐容比飛仙皇畿功德府夫子贊其權中道
折此翼寒霜凜炎天臨河洗紅妝對日摘金鈿何以喻貞
心南山石非堅歲運忽推改于今三十年天道有顯報母
壽名旣傳作歌在京師庶以風八埏

遷情

令傳部伍寂無譁野宿微聞奏遠笳霜氣蕩天懸漢月風
聲動地起胡沙手支長劒秋橫淚露滴征袍夜憶家自信
此身歸未得但令鄉夢到中華

次韻答朝支曹子貞

柳簇金溝蘸碧波，雲深貝闕瞰重阿。
鳳凰曲奏鈞天樂，烏雀橋通織女河。
萬井閭閻春浩蕩，六街車馬曉坡陀。
山人素有林泉興，柰此承明侍從何。

送高參政

鳳皇池上鳳皇來，河岳從來出異材。
酒興半酣燕市筑，詩情遠寄草堂梅。
風生黃閣推高誼，星繞紅雲遍上台。
事業無窮才有限，春風桃李好栽培。

劉霖

霖字雲章，安福人。從虞道園學。至正十六年鄉舉。
會寇亂，避地泰和，隱居教。授明初，特徵不就。

按通志選

舉淳熙元年解試有劉霖
安福人茲據人物志采入

白馬峯

亂後多君問故山
千家共鎖綠陽灣
紅亭古木春烟外
畫鼓平湖暮雨間
鷗鷺影涵洲渚靜
菱荷香漫午風閒
東陽讀易歸猶得
白馬黃牛任往還

武山

一山高聳鬱嵯峨
勝日尋幽得共過
百里長江橫翠帶
幾重秀嶺疊青螺
陶皮石室寒煙少
武姥經壇古樹多
得乘風據鰲頂
笑看朝日出滄波

劉倩玉

倩玉字伯琛永豐人至正十六年鄉舉

中秋對月

十年對月干戈裏忍向尊前更浩歌
光滿又逢新節序
虛難認舊山河
霓裳猶記開元曲
桂籍空懷進士科
矯首
廣寒宮闕近欲將消息問姮娥

危希尹

希尹南城人

粘窗短歌

娥眉影動半輪月
巫峽山頭看晴雪
只愁夢裏見梨花
一夜海風吹石裂
波浮洞庭光玲瓏
玉纖翦水描秋空
丈夫壯志在皎皎
俗子塵障徒重重
盤鴉字出人未識
影不搖紅燈照席
三年刻楮正自憐
乞巧何能逢七夕

江西詩徵卷三十一

江西詩徵卷三十三

南城曾煥賓谷編輯

元

楊 璿

璿字季子龍興人家世以文學稱工詩與兄鑑齊
名至正初用薦以布衣入史館爲校勘事畢調唐
元衛教授厯中書檢校官經略江南至閩道以疾
卒

晚憩澗北亭

我性喜蕭散東園時獨行高亭俯絕澗下有流泉聲秀木
翳繁陰朱華散微馨踟躕澹忘歸夕露沾我纓人生忽如

寄何乃苦營營優游在空谷飲水有餘情

夏日山中讀書

翳翳嘉木陰結廬三四椽南風五月中日夕聞鳴蟬居閑復奚爲涵泳聖人言時於會心處掩卷自欣然

送別錙伯章歸省時錙方悼亡故并致其意

斗酒酌未盡離人去匆匆歸心逐海月飛遶香牖峰峰前綠蘿樹下有五畝宮上堂壽尊親手把黃金鍾入室獨無依風吹羅幔空雖有兩小妾顏色如花紅不敢伉儷情虛爲天冶容人生百年內哀樂本無窮自非曠士懷寧免勞其中心堅抱節義行止慎厥躬贈言匪諧謔勗爾保令終

吳字吳亨號吳泉吉安人至正間以從征貉寇功授永明簿有性情集

校獵曲

豪鷹厲風翮駿馬騰霜蹄長楊出旌麾上林喧鼓鼙飛雨雲中落駭獸草間啼翻身射天狼隨手墜金雞詞臣賦羽獵侍宴明光西

銅盤歌

武皇鑄銅柱上有承露盤盤出仙人掌高凌浮雲端金莖的皦珠光寒和以玉屑供朝食一旦神歸茂陵去苔花滿眼秋霜殘思君不見淚如雨銅柱淒涼圍畫欄渭水西風黃葉落驅車遠載來京洛盤傾柱折聲如雷驚起千年華

表鶴暮雨空山泣石鱗寒烟斷甕埋銅雀君不見長林翁
仲笑相迎青鳥不來海波涸

梨花曲

仙妃下瑤圃靚妝乘素鸞盈盈含芳思脈脈倚闌干冰玉
肌膚愛貞潔多情長得君王看白雲滿階月欲暗香雪半
樹春猶寒憑高枝迎淑景隔花低蹴鞦韆影美人微笑
步花陰玉纖自把宮鬟整東家蝴蝶雙飛來芳魂欲斷梨
雲冷

節士吟

修竹生中林長松在幽壑嚴冬霜霰零枝葉不黃落夷齊
歸西山餓死無愧顏魯連蹈東海一去竟不還蘇武持漢

節饑來嚙寒雪遂使李陵慚去住難爲別古人重義不顧
身聲名烈烈垂千春採薇嚙雪辭金者寥寥千載空無人
倦彼宦遊子胡爲寡廉恥我歌節士吟六合清風起

蘆花塢詩

飄飄校書郎棲迹蘆花塢孤雲卧高林雙鳬下清浦玉樹
帶蒹葭秋光映眉宇冑懷冰雪明容儀鸞鳳舞昔陪青藜
翁灑翰羣玉府佩劒出龍泉烟塵暗中土翩然賦歸來垂
綸傍蘆渚雪花香滿襟風絮光翻羽邀彼鶴上仙泛我尊
中醕高歌落海蟾長嘯驚石虎願接盧敖遊仍呼太白侶
飛駕凌清虛乘風過元圃

天台歌奉簡郡庠謝廣文玉成

峩峩天台峯峯高幾千丈金烏浴海潮飛出天門唱中有
綠髮翁神清氣豪宕遠繼太傅蹤遊觀赤霞障著屐步雲
衢鳴珂對天仗翩然舉飛翰振鐸螺川上文章若有神班
馬不相讓詩興秋雲高詞氣春濤壯茲辰涉大江攜詩遠
來訪延坐振文堂高談知雅量魚來芹泮看鶴去梅邊放
孤雲起東山式慰羣生望

簡彭志南

歲在丁丑春東風轉花柳來從天池游劍光動星斗君有
倜儻懷平居敦孝友氣壓波濤翻聲吹鯨鯨吼高直薄曾
雲片言解紛糾偶坐逢故人傾倒接盃酒書屋臨大江竹
陰覆晴牖畦蔬遶回塘稂稻滿南畝甘旨奉親餘此樂真

罕有蹇余客平原契濶歲年久雲樹晚蒼蒼思君重回首
送左子聲赴金陵收父骨歸葬

哀哀歌蓼莪戚戚左氏子悠悠感中懷靡靡去故里痛父
骨未收隱憂徹肝髓孤舟過金陵惜別臨鷺水岸柳情依
依江波寒瀾瀾旅櫬幾時歸山中白雲起

黃金臺

邊風動燕雲開千金買駿骨宛馬從東來金臺百尺空中
起樂毅趨燕從隗始高陵秦塞雲幾重俯拓齊城地千里
昭王已矣賢士亡黃金化土高臺荒白虹貫日天蒼蒼易
水波寒沙草黃

鳳凰臺

望佳氣臨高臺金烏初出海照見鳳凰來千年王氣久消歇忽聽韶音動雙闕烏衣巷口烏鳴春白鷺洲頭潮湧月雲中天樂下瑤京仙女乘鸞弄玉笙歌聲噦噦臺前起散作春風花滿城

陪全尚書子仁馮高州子羽宴劉宏遠江樓子仁大書先得月樓四字且歌以美之子羽作記俾余賦詩卽席奉呈

昔年李謫仙呼月醉南樓尚書今夕宴客有馮高州坐邀劉顥清興發樓倚長江先得月玉簫吹徹彩雲留聲引鳳凰來上闌入窗玲瓏風露寒秋高銀漢生微瀾團圞未離滄海角流彩已照虛簷端尚書特筆高州記飄飄頗有凌

雲氣毫翻雲藻玉，蜍乾袖拂天香金粟墜。醉歌窈窕邀娉娥，滿目飛光感興多。仙人騎鶴遙相過，玉壺瀲灩搖金波。不醉如此良夜何，吁嗟不醉如此良夜何。

追和文山青原詩柬陳村民寄謝禪林諸友

曉行金粟地，袖拂綠蘿烟。水出源頭活，峰迴樹頂圓。因君寄高興，來此洗塵緣。唯有山中客，猶書甲子年。

昔人吟咏處，醉草動春蛇。岩石曾爲供，溪毛可薦茶。荆留千歲樹，桂老九秋花。欲結淵明社，重來惠遠家。

上翰林學士曼碩揭公三史二十韻

乾坤鍾秀氣，河漢見奎光。今代斯文主，名公碩德昌。總裁修國史，特命正皇綱。身在雲霄上，親依日月傍。大才司馬

富直筆董狐良運屬遼金絕統承南宋亡權衡在掌握正
閨繫綱常前席頻垂問當廷賴主張陶鎔金在冶追琢玉
成章中使頻頒食初筵許拜嘗八珍兼上味九醞酌天漿
夜送金蓮炬朝回白玉堂高懷散春旭清氣灑秋霜天廡
來龍馬金臺鳴鳳凰諸生慚蹇劣萬里看翱翔每誦高郵
句遙思翰墨場參陪隔霄壤感激裂肝腸鶚薦如堪待鴻
書幸寄將悠悠燕樹遠漠漠楚雲長但願持明鑒高懸照
八荒

奉贊歐陽承旨圭齋於書臺楊青城宅時公來參族
譜

衡嶽降神日玉堂承詔時神仙見標格鸞鳳上丰姿黼黻

袞龍著文章天馬奇日邊辭玉醴岩下採金芝來續廬陵
譜兼題六一詞書臺見顏色翰墨灑淋漓雲遶清湘樹心
懷丹鳳墀停盃操別鶴一雁過天涯

分題得東山送趙原善之金陵

亭亭秀氣出芙蓉紫翠浮巒勢若龍雨過孤雲來遠岫霞
迎初日轉高峰燒丹未就楊仙術著屐先追謝傳蹤早晚
金陵望佳氣攜書好去上東封

秋篷軒爲楊仲濩賦

詩人託興在秋篷瀟灑吟軒畫舫同江海餘情孤榻上乾
坤清氣一窗中疎簾涼灑芹池雨曲檻香來蕙畹風黃葉
滄波垂釣處倚看雙雁上晴空

青青水中蒲

青青水中蒲新葉淨如拭元是寶劍精森然此留迹
青青水中蒲九節根如玉食之可延年神清髮長綠
青青水中蒲千歲花開少採得紫茸時緘書寄青鳥

春日漫興

啼雞不住催人去望斷鄉關何處家三月狂風吹倒樹攪
人離思是楊花

螺川八景詩

青螺峰

螺峰臨北渚千古畫屏開瞰水青涵影浮空翠作堆江流
如變酒山好若爲怀有客吟招隱靈泉松下來

白鷺洲

吉士長懷古來遊白鷺洲波分孤嶼出沙帶一江流漁火
楓橋夜書聲竹院秋磯頭明月上吟望意悠悠

金牛泉

金牛泉脈遠飛瀑出江干氣接螺川潤聲吹露渚寒濯纓
臨沸石洗耳聽驚湍望斗尋源者龍光此處看

丹砂渡

渡口問丹砂東風一徑斜岸聞多藥草溪失舊桃花隔水
招漁艇臨流立雁沙有懷勾漏令準擬泛仙槎

詩人堂

詩人堂上客載拜杜參軍大雅今誰繼高風自昔聞魂來

花外月吟斷樹間雲千載龍岡會因詩倍憶君

魯公祠

魯國祠堂在螺川古驛東吉人思別駕唐史見孤忠礎潤香芹雨廊廻古柏風我來拜公像肅肅仰冥鴻

讀書臺

曉上讀書臺臺高接上台書生燈火夢丞相袞衣來山色看還近松陰掃不開倚闌吟眺處獨鶴暮飛廻

洗耳亭

路入青原去停驂洗耳亭偶聞徵隱逸來此濯清泠問法黃龍在吟詩白鶴聽巢由不可見松月滿窗櫺

黃昭

昭字觀濶撫州人至正中官廣州路新會縣尹

厓山

八月涼風起天末日色蒼涼海光薄厓門咫尺斷千山千古興亡恨悠悠憶昔王師下江表艤艫百萬貔貅躍西湖歌舞散雲烟南海旌旗起蛟鱗將軍奉詔勇且仁黷武殺降非所樂幼主焉知國祚亡從軍半向波濤落紀功勒石墜嵯峨奏凱旋師踐幽朔乾坤清寧六十載折戟沈沙半銷鑠海隅小邑喪亂餘風俗粗疎少文學慨無遺老話前朝耳聞目見真蕭索可知在德不在險天塹東南非所託潮落潮生人不歸新雁年年渡沙漠

劉紳

紳字彥行南昌人工詩與虞伯生友善詔舉廉能
爲德安尉有雲松巢集

田父辭

昔杜少陵先生社口遭田父泥飲作詩美嚴公中
丞至今家有而人誦之予生數百載之下才學不
及古人然人心風化之所係今昔未嘗不同故採
撫里巷之言作詩一首題其篇曰田父辭以美南
昌新尹丁世臣德化風教之首著云

村居何寥閨日晏掩荆扉昨夜新水長池塘綠生衣始暄
草木暢微馨播柔荑青秧際白水遠樹涵夕暉時物盡欣
豫農事方自茲田父謂我言新尹世所稀近日傳新政百

里皆春熙里中大作社衆口誇令儀君實里中正耳目之
所司去穠差科起辛苦應門兒府帖前月下文字如星馳
上戸金幣簡輕重官崇卑中戸領鹽據運離南海湄大男
附書至名列中下資丁寧蚤輸納免使完膚笞但願歲豐
稔償逋豈無期深感田父言誤辱國士知況我病經久荼
毒含瘡痍藥費不可得束手坐待疲醫瘡與剜肉昔人徒
傷悲呼兒具紙筆急寫田父辭

余僑居烏暘山莊辱徐君景南來主西塾晚晴縱步
郊原徐賦古詩一首率爾次韻

幽居絕塵囂永日聞書聲荒村辱枉顧竹外瞻旆旌天馬
不受羈臨風一長鳴飄飄放志意邈邈思遐征相逢若風

江西詩徵

卷三十三

元九

九

昔使我塵慮清茲辰雨初過夕陽川上明王睢語關關佳
趣適合并長松招白雲悠然共英英足憫棲遯志頓釋流
離情羣行畦畛間初月如相迎江山付陳迹此地曾簪纓
文獻竟寥落澗水尚澗滢兵革未見息白髮滿頭生

夜宿後城觀葉梅東鍊師丹室中有宋故拙齋全真
二胡先生之祠

野岸晴沙白秋山落照紅丹光穿石室寶氣上神宮南渡
衣冠盡浮雲江海空梅東今夜月曾照昔人同

行軍掾佐唐宗仁過余山中留詩爲別走筆次韻以
謝

江邊簇馬耀霜戈驚動林間冰雪窩五載亂離知己少

樽傾倒別懷多裁詩忽就雲生席候吏催歸夜渡河戎幙
風清勞贊畫好將勲業繼蕭何

周志遠

志遠吉水人至正間以危太樸薦授太子說書得
母書遂南歸不復出

自題小像

十年塵土變形容惟有丹心日月同北海子卿祇未乳不
應已在畫圖中

黃季倫

季倫番陽人性高介工古樂府詩與危太樸倡和
嘗至京師從揭曼碩遊充三史書寫授長洲縣教

官

按季倫失其名據顧嗣立元詩選四集收入

和西湖竹枝詞

錢塘江頭莎草齊
錢塘女兒歌別離
願郎相見如月子
月子團圓無暗時

湖上女兒猶褐衣
出門日日望郎歸
春水繞湖春草綠
草上雙雙蝴蝶飛

龍從雲

一作雲從

從雲字子高
永新人少負經濟才
佐楊完者成克復之勲
爲都事歷官福建
儒學副提舉性曠達後
寓四明之慈溪
僦屋以居有釣魚軒集

明皇春宮以樂圖

華清宮殿春沉沉宮門楊柳垂黃金玉闕新度霓裳曲山
聲酣動君王心融融汗體生春困芙蓉露白桃花嫩可憐
飛燕在昭陽李白文章有遺恨漁陽回首飄胡塵花鈿委
地徒霑巾嗚呼我今展圖似閱史有國有家當監此

明皇秋宮夜宴圖

金莖滴露秋滿衣玉樓商葉吟參差六宮沈沈度清樂月
在華清池上芙蓉枝虹橋錦步龍尾隊十八宮娥舞相對
玉環吹笛背銀燈百歡媚得君王醉君王醉卧倚龍屏羯
鼓嗷嘈尚未停祿山含笑林甫喜但願君王醉不醒

題破窗風雨圖

雨歇荒雞叫山空木葉堆玉堂雲霧景多向此中來

南湖四時詞

畫船載酒及春晴
潋灩波光碧玉城
橋外綠楊誰繫馬
水晶宮裏管絃聲

槐陰屯午咽新蟬
一枕南薰暑不前
隔岸荷風新雨後
白鷗點破鏡中天

松寺聯陰晚更幽
天光倒浸玉壺秋
蓼江棲鴈忽驚起
一曲漁歌月滿舟

平湖雪壓小橋低
萬里乾坤眼欲迷
誰泛扁舟深夜過
却疑人在剡溪西

仙壇

碧壇蘿影蔭龍蛇
騎鶴歸來棗似瓜
仙語風前飄玉屑
道

衣天上剪雲霞寒渾六月猶無暑老木千年尚有花采藥
青童來借問蒼烟起處是誰家

余詮

詮字士平豐城人至正間爲江浙儒學副提舉洪

武初僑居崑山

按賴良大雅集作
字古平撫州人

海水操

并序

陳母莊傷其夫溺死於海作

海水蕩瀟兮茫無津涯夫君一去兮杳無還期爲死爲生
今曾莫我知欲往從之兮襁褓有兒同室同穴兮我志獨
違恨深海水兮曷其已而

送張德常之松江判官

萬景涵濡雨露中百年文物倏飄蓬
鱸魚獨擅吳中美驥足寧如冀
北空肝膽幾時酬楚國里間從此變王風
吳淞江水秋無底好與使君襟抱同

熊夢祥

夢祥字自得進賢人以茂才異等薦爲白鹿山長
授大都路儒學提舉崇文監丞後寓居婁江上與
玉山主人爲忘年交年九十餘卒有松雲道人藁
客懷奉簡玉山

我昔離家七月強只今十月隕清霜已慚濁酒黃
花興應悔青鏡白髮長翠袖天寒修竹暗綺窗
日煖唾茸香夜來枕上揚州夢江北江南是故鄉

卻西湖竹枝詞

船頭新月恰如眉折得雙頭蓮子歸荷花菱葉不同種
蝴蝶各自飛

簞女臺歌

并引

在京南城放生池東高三丈蒿草芄芄鄉老俱稱
金蕭后簞女於上

荒草堆燕雲號爲簞女臺金源蕭后飭宮女表正壺範出
聖裁此事庸或有史筆獨不該繁華若流水去者不復回
後人見遺跡孰不興遠懷閒花野草今猶昔當時美人安
在哉

春暉樓分韻得仰字

行行別楚州秋蕪半蒼莽關河颺旌旗令人心怏怏禮樂
闕百年於焉口悽愴厯此艱危餘別郡政勞攘何由得清
夷復見桑麻長故人居桃源買舟得獨往坐我廣廈間溥
言慰遐想維此秋方中桂月延清賞連甍接層臺夜色亦
蕭爽主人情更真頓覺脫塵鞅吳歛侑金尊謳歌共抵掌
歡會亦可期樂事非勉強醉後下高樓涼月猶在仰

丁都護

并序

樞密三知院答里麻監總戎曹州進兵陷陣諸將
卒士棄其主將而潰於是被害甚慘後以十月末
旬獲其骨而歸招魂於順承門外

丁督護郎上馬將星煌煌干戈威揚貔貅百萬羽林郎旌

旗所指孰敢當丁督護郎下馬穹廬滿野笑言啞啞良家
女兒擊玉聲夜來葉落消長夜丁督護郎進兵旗電鼓霆
澤劒流星指麾衛軍歌楚聲主將傾危血刃腥丁督護魂
來歸少妻嬌兒涕泗漣而去時鞍馬何人騎肘後玉印今
歸誰嗚呼猗戲國之梁棟哲人其萎

湖光山色樓

移舟界溪上忽見海虞山山接空青外湖當慘澹間松聲
聽欲近飄影坐看還何處西風起漁歌下別灣

題王元章畫梅花

水影晴光爲寫神當時已是失天真一從殘角吹新曲幾
向寒谿覓故人綈袂歸來猶有月珮環飛去更無塵莫言

醉魄空離落信把和羹屬大臣

題管夫人竹

夫人寫竹何縱橫錯刀離離光怪生
安得月明招白鳳玉闌西畔聽秋聲

題二色芙蓉便面

曾障西風十二闌亭亭醉醒碧波寒
月邊青鳥無消息冷落人間作畫看

題李息齋竹

薊邱道人寫瀟湘煙寒兔齒石蒼蒼
素娥剪翠雲葉亂三十六陂春水香

題畫山牀

傍路依山到處生只因樵牧慣相輕若教塵俗如桃李未必梅花肯作兄

題王元章梅

紫禁春醲雪未消年年香冷只飄飄許身入畫酬清賞不嫁東風過小橋

題蕺山題扇圖

蕺山老媼本無知恰值將軍乘興時竹扇一時光怪動莫教低價與元規

玉山巖答

秋水藍橋一尺強愁聞玉杵搗元霜東籬老子烏紗薄西郭佳人翠袖長古寺竹深禪榻靜疎窻花落硯池香西風

江西詩徵

卷三十三

元九

五

鶴背三更夢笑看瓊花作醉鄉

于立

立字彥成號虛白子南康之廬山人學道會稽山中得石室藏書放浪江湖間與玉山主人友善有會稽外史集

芝雲堂以古樂府分題賦得短歌行

白日苦易短百歲良非長今日花間露明朝草上霜黃河無停波浩浩東入海弱水隔神山靈藥何由採羲和總六轡蒼龍挾其輶迴車謁王母蛾眉生素秋虞淵沉暮景忽在扶桑顛孰知青天上年年墜神仙尊中有美酒漉漉浮春香調笑青霞侶嬋娟紫雲娘今日不飲酒奈此白日何

來者日益少去者日已多太極那能窮渾沌不可補不如
醉鄉人一息同千古誰云刀圭藥可以養神骨天運未可
期且盡杯中物

至元戊寅四月十九日風雷大作村民以爲龍王嫁
女作詩以紀之

西方龍君嫁龍女雷車彭彭載風雨神奸夜邀髑髏語碧
草無光愁露渚鮫人獻綃珠淚泣鸞裙行煙翠痕溼阿鬟
嬌小不成妝帝與桑田湯沐邑臙脂紫土吹海腥陽侯擊
浪玻璃聲湖邊地皮薄如紙長堤捲作長河水

題顧仲淵棲雲軒與玉山同賦

玉峯連天向空起秀色盤迴三十里寒翠淋漓溼窗几影

落明湖一泓水明湖之水清無底幽人結屋湖光裏溪南
溪北花陣迷舍東舍西山鳥啼夜來東風雨一犁滿川烟
霧春雲低春雲無心無定據長在幽人讀書處未肯從龍
行雨去牕前且伴幽人住

題虞瑞巖白描水仙

流洲之君號中黃瑀冠翠帔懸明璫通明宮中拜帝觴帝
遣換骨生天香醉後橫斜踏明月月明零亂如冰雪爲傳
清影落人間化作幽芳更愁絕官車曉過西陵渡貝闕珠
宮鎖烟霧君王十二玉闌干玉盤倒瀉金莖露江風吹斷
舊繁華年年十月自春花寫成幽思無人省持獻瑤池阿
母家

題從子倫畫山水

我本山中人頗有愛山癖何人寫秋山秀色如可食天河
露下秋漢白挹露磨空洗秋色烟如洞庭水浸青芙蓉倒
影天光湛空碧又如飛龍天外來鱗鬣森森插霜戟遠嶼
瀾茫隔烟浦冷雲濕翠愁痕古便從海上訪三山又恐征
帆迷處所若耶溪在何處歸去來山中住道逢仙人紫綺
冠指點丹崖是征路寄書松竹問平安莫嫌老子來遲莫

題錢舜舉畫青山白雲

吳興山水天下無吳興畫手天爲徒天河染露洗空碧輕
烟薄素開新圖白雲欲散松風起迴如丹邱隔海雪後寒
模糊溪光倒影丹翠溼又如洞庭水浸青珊瑚綠蘿吹香

挂秋月小橋野逕相縈紆行人遙遙向何處丹崖石檢或有仙人居溪山如此無不好築屋臨流可投老春雲秋露石田腴我欲耕煙種瑤草

贈松崖隱者

滄江之水清如空長林杳嶂高龍從何人於此憩幽寂白雲滿地迷行踪層崖蒼蒼如積雪巨靈手擘芙蓉裂蒼官鬢鬢老歲寒地位清高兩孤絕根蟠重陰神鬼會節抱太始冰霜結上有六月天風聲下有百尺之元冰門前夜半山月落子規叫絕煙霏冥隱君此意人莫識高比青松堅比石石上薜蘿聊可衣松根茯苓誰與食隱君隱君百不憂子之於世知何求棟梁砥柱或見用萬牛回首如山邱

題花蕊夫人像

玉屑丹砂和獺髓一點殷紅養花蕊冰肌玉骨自生涼不
信流年去如水火旗曉壓降王道貝闕珠宮長秋草摩訶
池上又西風流紅不向人間老

胡琴謠贈張猩猩

時西夏高
起文同賦

絳綃羃帳春雲熱銀蠟搖光眼生纈猩猩對客軋胡琴紫
龍銜絲度幽咽新鶯出谷調高聲間關瀉出春風情珊瑚
擊碎琅玕折鳳凰夜叫離鸞驚舞停回雪歌停扇一曲梁
州猶未徧細數驪珠下玉盤百尺冰絲貫成串錦瑟無聲
帝子愁湘波搖江江倒流西風忽起茯苓浦吹下滿天鴻
鴈秋張猩猩更坐調一曲玉軸銀絃再三促爲君寫作胡

琴謠西夏郎官面如玉

花游曲和鐵厓先生

煖雲著柳春濛濛錦航兩旗楊柳風美人娟娟錦船裏約
爍瞳人剪秋水阿鬟養花花滿門洗花染作真珠裙窈窕
行煙踏煙步野棠亂落麒麟墓東風撲天驅馬來露香翠
泣鴛鴦杯玉箸丁東鳴碧碗鸞簫二尺猩紅板瓊花起舞
歌竹西鐵崖酣春寫春題幽緒不憑蜂蝶使怨絕冰絲絃
第四便裁雌霓作雲箋寫入花遊第幾篇

送姚子章赴浙省計事玉山同賦

之子東遊去神駒背若鴻天樞黃道外星使紫微中北岫
雲雙屐西湖雪一篷重來舊遊地談笑莫怱怱

送趙克讓歸洛陽赴舉

聖化開元極文星入上台梁王尤好賦賈誼獨多才江草
迎人遠官花近馬開君門多雨露得意早歸來

暮春偶書

沉沉柳巷無行跡惟見簾前落絮頻小雨欲晴先釀暖輕
寒拂地不驚塵已知春事無多日解醉花前有幾人深院
時時剪刀響倩誰裁製小烏巾

題顧處士竹逸亭

徵君結屋玉山裏箇箇修篁一尺圍秋聲六月起蕭瑟翠
雨盡日生霏微仙人或送青精飯道士時來白羽衣清觴
雅瑟在磐石坐看白雲天際飛

題宋高宗詩意便面

當朝山色尚煙嵐近侍承恩罷早參邊奏不來春殿寂白
將情思寫江南

觀牡丹有感

搖搖紅霧一枝斜看舞東風兩髻娃堪笑年年未歸客借
人池館賞春花

題趙仲穆畫馬

房星夜入水龍馬出渥洼西來幾萬里進入天王家公子
重毫素慘淡生風沙明時不用武終然駕鹽車

梧竹謠

并序

雲臺外史題梧竹堂樂府多道梧而略於竹豈愛

惡有不同邪用續其語以補其闕云

鳳來住高梧枝高梧葉老秋風吹月明夜夜栖啼鳥不如
池邊竹千尺露葉霜筠照寒碧今年結實苦未多明年實
多鳳來食

夜夢家兄又夢陳敬初

我來與君同作客前年共住江邊宅君騎快馬事遠遊我
亦流離去鄉國君家慈親猶未老眼前骨肉仍相保三人
兄弟何人強之子文章最稱好我家老兄浙水濱老兄比
弟家尤貧五年零落不可見迢迢歸夢還相親人閒夢中
相爾汝傍人不知夢中語起來明月滿虛庭丹楓墮影天
霜雨秋風江上生白波秋江蕭蕭鴻鴈多遲君不來知奈

何聊復慷慨成悲歌

題米元暉墨山

生來墮塵網若爲塵網縛暇日起我早騎驢出東郭城門
老人髮半垂問我騎驢何所之爲言欲向山中去茅屋正
在清溪湄山中之人面如玉手把素書跨黃犢石泉夜煮
茯苓香滿屋秋雲邀共宿綠蘿曉月懸松風縹緲惟聞煙
外鐘十年往事一回首已隔雲山千萬重潦倒狂吟頭半
白把卷令人念疇昔石田瑤草近如何題詩好寄山中客

擁翠堂詩卷

幽人結屋江邊住俗聲不到題詩處門前惟有樹扶疎簷
間只許雲來去落花如雨東風狂綠陰滿地春茫茫一聲

啼鳥驚夢破翠屏淺印煙峯長海綃輕薄煙霏暝空碧無
痕湛清影天風吹落竽簫寒嵐光溼透衣裳冷我生已有
遺世心便欲長往窮幽尋微茫樓觀不可到雲林冥冥苔
碧深

范寬小雪山

山人昔日住山中山中酒熟葡萄紅山人醉卧呼不醒浩
蕩十日吹天風夢駕天風度寥泝貝闕珠宮互明滅玉龍
千尺擁冰髯手挹銀河弄明月仙人勸我金屈卮更吹白
玉雙參差東風琪樹花如雪千片萬片凌空飛怳怳魂神
逐煙霧起來却蹋孤山路瑤華滿地不堪拾騎驢直上梅
花墓范寬善畫老有神恍然見我夢中身煩君更向溪橋

畔爲寫當時踏雪人

題蘇小小像

花宮玉燕啼酣春
春風勞勞驅夢雲
夢喚夢喜春不聞
紅萱露滴真珠裙
夜燕玎玲隔牕語
碧紗凝烟咽金縷
行雲妬殺巫山女
芭蕉葉葉黃梅雨

題桂花仙人

紫虛真人離紫宮
流光夜下如長虹
明珠結佩冠芙蓉
釣天廣樂來相從
居然太虛幻爲月
月中有璽臺白銀
闕羽衣霓裳歌合
節玉杵搗碎黃金
屑金屑霏霏滿下
方倒吹露脚秋風
香齊州一髮煙微
茫但見萬國涵清
光

漁莊

二月春水生三月春波濶東風楊柳花江上魚吹沫放船
直入雲水鄉蘆荻努芽如指長船頭濯足歌滄浪蘭杜吹
作春風香得魚歸來三尺強有酒在壺琴在牀長安市上
人如蟻十丈紅塵埋馬耳漁莊之人百不理醉歌長在漁
莊底

平遠樓

對酒川光溼鉤簾爽氣浮地從天際沒水近日邊流樹密
煙藏寺蘋生綠滿洲幽人有佳興於此一登樓

題水竹居

隱君溪上茅齋好遶屋竹林秋更清放艇莫驚鷗鷺宿吹
簫還倚鳳凰鳴一川夜月芙蓉淨數畝涼雲薜荔生俗客

不來清晝寂小牕瑤瑟間書聲

送柏子庭歸四明

東風夜起江花落盪槳過江江水香並人晴樹日杲杲隔
岸煙草春茫茫題詩自有湯休句載酒寧無賀監狂菖蒲
花發蒲萄熟思爾令人意不忘

玉山席上次曹新民韻

綠樹當門過屋高滿溪新水繫雙舸千林夜色懸青雨萬
頃晴雲捲素濤鸚鵡傾杯傳翠袖琵琶度曲響金槽揚雄
賦就風流甚製得輕紅小袞袍

姚子章人回知騎從在杭卽欲渡江一見遞中得書

聞已歸玉山中遂成悵然因寄

聞往西湖十日還冷泉亭下水潺湲錢塘東去直到海於
越南來總是山情逐斷猿明月夜與隨孤鳥白雲間玉山
池館花無數應待幽人一破顏

題胡環瘦馬圖

堅昆此去幾萬里荒草黃雲連白沙到得單于臺下日暖
風開遍地椒花

題陶穀郵亭夜宿圖

行春使者惜春華處處春風楊柳花不向江南望江北却
將恩怨屬琵琶

響屨廊

山中老禪寂同坐說吳王時有風前葉鏦然下屨廊

泊閬門次玉山韻

淶水秋風蕩槳船
白蘋洲上月初弦
清光半入紅窗裏
照見羈人夜不眠

泊新安有懷九成

過雨收殘暑
西來水似天
秋風生柁尾
明月落尊前
慘澹依山寺
欹斜下瀨船
清歌不成調
思爾枕書眠

舟中作

落日清江好放船
西風滿棹未須牽
鯨鯢已靜波澄海
鴻雁初來水接天
過眼風光如隔夢
近人風月也堪憐
歸來尚有黃花在
暫辭佳人錦瑟前

玉山佳處

春風昨夜起吹蕩滄江水幽人渺何處迺在玉山裏玉山
秀色何從見滄江之水長縈迴縈迴不盡遶山去但見滿
谷桃花開草肥青野鹿呦呦花下殘棋暮不收隣家野老
長攜酒溪上漁郎或艤舟幽人讀書忘世慮結屋山中
最佳處世上紅塵空白頭攜書我亦山中去

釣月軒

夕息西軒陰頗愜濠上景持此明月釣投竿釣清影流螢
飛忽暗幽鳥棲還警遊鱗亦復來露下芙蓉冷

新秋得雨字

七月涼颼初破暑秋聲蕭蕭在庭戶清新故人忽見過契
濶有懷何足數西夏郎官好詞翰中州美人好歌舞懸知

野衲解談天况有仙人能喫雨金刀削翠藕絲長綠房破
繭蓮心苦詩囊脫穎或有神酒令分曹聊可賭慙慙素手
累行觴瀟灑清談藉揮塵紛紛市上聚蚊兒昌黎先生喫
如土

柳塘春

江浦雪消楊柳春檻下新水碧粼粼嫁得東風最輕薄吹
蕩柔條拂著人

正月已盡寒未收柳塘曲曲帶平流青絲銀瓶送美酒赤
欄盡橋橫釣舟

日落大堤楊柳明棲鳥也復可憐生若得清明花似雪風
光多屬上林鶯

嫩綠新生楊柳枝輕風故故向人吹春波不盡東流意折
得柔條欲遺誰

漁莊欸歌

芙蓉千樹齊臨水橘柚滿林都是霜飲罷玉人歸別院只
留明月照漁莊

對酒清歌窈窕娘持杯勸客手生香袖中藏得雙頭橘一
半青青一半黃

李簡

簡字士廉廬陵人僑居崑山好學有志節與玉山
主人友善

次唐本初韻

江表言集 卷三十三 三
總道周南多滯留寥寥杜曲可真遊駐顏無復青精飯取
醉能疎藥玉舟獨雁叫雲天拍水斷鐘送晚月當樓庾郎
此夕懷同賦一發商聲報答秋

秋興

黃落山川秋氣高一聲白鴈過江皋西風芳篋收團扇涼
月重簾落剪刀倦志已孤紅叱撥牽情何事紫檀槽吳霜
易點青青鬢莫道當年記得牢

陳煥章

煥章一名與彰字春成又字宗周號渙翁永新人
試不第肆意於詩遊覽半天下暮年隱居白雲峯
與吳莘樂湛碧虛爲詩友號古春先生有白雲集

獺皮褥

賴侯失國毛嬙老蓮葉裳衣爲誰好曲阿湖上來菱舟濺
血淪精哭秋媪祭魚永謝菰蒲春去作香魂薦寢衲綠雲
四面裁如意毳影當中吹暖塵玉指象林聊歲晚絕勝會
死龜茲板聞道驚鱗膽尚寒莫教展放芙蓉館流蘇帳裏
佳人語卷却龍鬚偏愛汝夢中若更說離騷望斷霏霏楚
天雨

別廣西憲史張漢英

長吟不了秋階蛩渴飲不盡春江虹涓涓泠泠仙掌露落
落穆穆長松風少年憲幙廣西去意氣倏忽超鴻濛御史
行部玉花驄南度瀚海君與同日出鰲頭指若木月明鵬

背看芙蓉有時調笑却蛟鰐赤手得珠龍伯宮君才一似
列蕃貨明犀色射珊瑚紅象牙鶴頂世所有桂蠹盛以玻
璆鍾歸來老母怪方朔何事紫薇衣袖中劍光差差不可
押寧教小蠶全其鋒願君此行好自愛雲氣昱昱東崖東
劉躍

躍字宗起南唐駙馬後徙居廬陵之中洲號中洲
釣者累徵不出作樓曰海雲延四方之士講學其
中有淵泉集

園樂爲國賓先生賦

君不見金谷平泉恣歡謔異石奇花成海嶽寧知富貴生
百憂一旦荆榛總寥落灘江先生隱者流數畝荒園卽爲

樂瓜畦新雨長更鉏橘井青天甘自盤生意隨時灌野芳
餘香暇日收仙藥倦來佳句獨長吟醉裏濁醪還更酌不
讓習家兼有池絕似溫公乍居洛前年丹詔急賢良高卧
白雲辭好爵東鄰公子帶橫金北里老翁田負郭從渠五
鼎厭珍饈自分杯羹飽藜藿世路風波不暫停柴門烟月
應如昨我亦江湖垂釣徒直鉤兼恨多蛟鱷明當抱瓮託
幽棲尺書先寄東飛鶴

梅村歌爲金溪王用霖賦

王先生有高趣家在梅村最深處清溪一派遶孤村種得
寒梅千萬樹年年凍雪封林園羣木生意俱斬然忽驚一
蕊破香玉直與天下春爭先繁花爛漫相高下彷彿枯梢

晴雪亞光涵冰樹不勝秋影入瓊林欲無夜先生巾屨獨
行吟看花繞樹窮幽深奚奴不覺錦囊重發興兼有龍蜃
琴笑殺西風明月冷負卻暗香與疎影絕似羅浮仙者流
妙處無言心自領

和送石維高之泉江

愛君吟思浩無邊眼底交遊最少年開口已誇成玉唾論
心偏得醉金船鳳凰瑞世鳴初日鴻雁排雲上遠天此別
但應勞夢想高標梧竹淨娟娟

沙渚盟鷗

水平沙白渚初晴好共羣鷗訂舊盟斜日荒涼雲影落清
風浩蕩雪衣輕海翁坐對應相狎山客行隨亦不驚卻笑

當年賦鸚鵡疎慵久已謝浮名

良月宴于棲遁處賦殘菊

菊殘猶有最高枝棲遁齋前足自怡
深夜雪霜金瑣碎清晨風雨玉離披
魏公不負題詩好陶令空嫌送酒遲
憐爾秋香渾未減餐英回首更何之

奇石爲黃大賦

相對憐孤石由來出四溟一峯支瘦骨
千穴見奇形空洞含天趣巉巖毓地靈
鰲移愁負重龍擘帶餘腥巧斲慚羣
匠神鞭謝六丁晴雲時吐白陰薜間書
青花木多餘地琴書滿廣庭願言題琬
琰珍重列圖經

題無詒沅湘蘭竹圖

兩竿翠竹拂雲長，幾葉幽蘭帶露香。
好手移來牕戶裏，不須千里望沅湘。

陳徵

徵字明善，南康人家。廬山五老峯下，少從吳草廬遊。至京師，虞揭諸公推重之。後卜居吳中，不慕榮進，時稱天倪先生。

陪貢仲章學士游虎邱次韻

詞臣號仙職，使華成清游。
挂帆出近郭，覽古登崇邱。
高閣白雲度，窄堦凌漢修。
雨歇劍池淨，晝長巖樹幽。
野花背春發，林筍當夏稠。
山名曠百世，題墨馳遐陬。
宴酣匪絲竹，吐納良風流。
陽暉迫西邁，吾儕已久留。
還家坐齋閣，香火明

夜簫因念貴適意浮生同一漚

留題延福寺

來尋釋子虞山上坐愛女蘿緣石牀飛甍五采走雲氣老
樹一色吹天香清風爲我過松竹繁響入耳無絲簧說與
歸人莫漫急市塵塵土正茫茫

遊穹窿山

綠水青山今再遊杜鵑花發雨初收猿聲好在千章木雲
氣深藏百尺樓麋鹿訖今來古澗麒麟無主卧荒邱吏情
益愧成羈紲西望太湖烟際舟

李本

本字伯宗臨川人吳艸廬門人與弟棟講明濂洛

之學所居有環翠亭君子堂學者依之

送邵天常歸山

搏風徑擬九霄飛志業誰知與願違
虎豹關深書未達雞豚社遠夢先歸
香侵客路花方盛綠滿家山蕨正肥
去後且從閑處樂徵書有日到柴扉

吳元善

元善廣信人

題黃鶴山焦畫古松禪師聽松圖

年去年來年復年長松亂立南軒前
綠陰遮却半天日聲氣欲驚山虎眠
老僧時倚闌干聽聽之有動還無靜
雨擊風敲朝暮聲飄然不礙芙蓉鏡
松梢挂月月放光一白倒

漫葺苔蒼濤聲響於彈八琅隔窗泠泠形體忘我亦耽
清氣者十年埋沒紅塵下踏遍東阡與南陌幾欲投閒閒
未得聽松軒人年已大兩耳松聲幾經夏平生愛入青松
軒耳聽不厭松聲繁他日東林結蓮社再招陶令來祇園
聽松禪客耳能聰著箇幽軒萬木中風卷翠濤聲急處海
門飛出老虬龍

邾堅

堅臨川人

呈復菴先生

并序

向者令嗣遠歸慕蘭之久深慰渴思故忘其固陋
輒賦鄙言方自愧赧繼承尊作悚懼無地僭次韻

奉呈尚祈賜教

炎夏謁講席鶉火昏在午弗畏褊褊譏願接荊州語果如
坐春風胸次包海宇孳孳素履勤力學不遑處令譽洽東
州華藻擅南土久涉事物情卽心慕巢許託言肉食鄙藜
藿雜陳旅詎知形役拘安逸乃天與白眼曠流俗草澤傲
軒組行方愜輿論所向無齟齬悵望紫芝歌引領復停佇
揮掃動龍蛇制作中宮羽別墅橫溪濱水竹得佳所願茲
安樂窩童穉習尊俎村市接海隅吾民頗繁聚廣野富桑
麻沃壤多稷黍令子恩例歸綵衣堂下舞蘭芽茁雙秀箕
裘纘遺緒堅亦忝末學靜退居草莽一自走紅塵道路且
修阻若爲薄宦羈碌碌曷勝數早識名教樂敢自踰規矩

今幸覩儀刑沾溉斯亦溥海嶽寫高深微言煩品敘

余震

震鄱陽人

菊山詩

處士菊山隱山中事事幽飛泉來木杪濺水落巖頭衣潤
朝嵐重花開涼露秋思君不可見塵土欲淹留

李鎬

鎬臨川人

植芳堂詩

春陽被臯陸時雨浹初晨荷鉏臨前除闢壤當荒榛藝本
日成列培根毓奇芬條枝及時榮萼萼華以分服綵憩嘉

江言得 卷三十三 三
蔭端居雖垢氛眷茲世葉繁德馨惟日新興言用棄穢庶
以樂吾真

危誠可

誠可號石壁南豐人

宿南臺道院

門前滿眼是黃塵夜叩山房寄此身在太極先原有道除
神仙外少閒人沙填方石千年識水到南臺幾度春縱得
金丹真不死海枯塵起更傷神

劉雪窓

雪窓安成人

贈王知州德貞

平生吟卷中不作送行詩清貧王太守不可無我詞見說
理歸舟蕭然如來時豈無懷金人白璧詎敢疵六載莅安
成清苦人得知罷衙卽杜門糲飯陳鹽齏非不嗜肥甘常
恐病黔黎人生五馬貴誰分忍寒飢以身任王事鞅掌不
憚疲吾州文獻邦士論安可移是非與毀譽千載涅不緇
向來幾州尹未有賢如斯勁節凜秋霜足爲當世師北風
驅征帆明日天之涯安得叫天闥留君長治茲小民正垂
泣奸吏初解頤願公入臺憲早見澄清期

游子敬

子敬臨川人有雪漁詩集

昭武客興

江西詩徵

卷三十三

元九

三

昭武荒城寄水邊偶來作客恰秋天黃柑雨後家家熟碧
樹霜前處處烟戍卒弦鳴驚鴈度估人帆落惱鷗眠不知
石鞏山何在漫欲親參半箇禪

次吳博士道人韻

行色春將暮江流日復深艱危今古恨飄泊歲時心江燕
時相語山猿夜獨吟客愁渾未減雲樹晚沉沉

會吳彥真見訪

茅屋秋江上畦蔬亂水中鳴猿號暮雨粳稻熟秋風好客
詩能寄貧家酒不空干戈與衰謝此日意無窮

答劉巨川

殺氣騰邊郡風雲會禁闌艱難雙鬢改牢落寸心違暮雨

悲笳急秋空過鴈稀故人將避世何事總戎機

秋興

野曠天高露氣浮月明烟冷水空流愁連鼓角雙蓬鬢秋
滿江湖一釣舟綠酒難逢陶令醉蒼生無復謝公憂百年
世事塵埃裏默默含情獨倚樓

江西詩徵卷三十三